

COMUNICATO n. 3327 del 27/11/2024

Traduzione in cimbri

## Da 39tane Konferéntz von Zungmindarhaitn durchgevüart von asesór Marchiori

[Cimbri] 'Z iztase gehalten in mörge von 20 von Bintlmanat in da Trentino Saal, in Palatz vo Dante Platz da 39<sup>te</sup> Konferéntz von Zungmindarhaitn, durchgevüart von provintziäl asesór vor di politike vorz haus, schatz, demanio un zo macha khennen di autonomi, Simone Marchiori, pittnandar pittar diridjénten von Dienst vor di Zungmindarhaitn un auzantn sachandarn Elisabetta Sovilla. Kolegàrt vo baitom soinda gest dar redjonäl asesór Luca Guglielmi un ettlane vortretar von kamöüschaftn von störegen zungmindarhaitn ladinar, möknar un zimbar, zbisnen disan soinda gest vüarar von lentar, toalnemmar von fervaltungsrat von kulturinstitut un vodar Autorité vor di Zungmindarhaitn.

Dar Marchiori hatt khöft vorgèllzgott alln in sèlln bodada soin gest vor di arbat gemacht zo schütza un vürzovüara di zungmindarhaitn un hatt gedenkht in trèff von provintziäl Rat bodase iz gest gehalten in tage pellar, semm er sèlbart bodar hatt geredet, geschafft von vorsitzar Fugatti, über di rècht von zungmindarhaitn. "In groazan gántzan disa konferéntz geat vürsnen pittar sèlln arbat" asó hatta khöft dar asesór, gedenkhante bazta tüat da provintziäl Djunta vor di lentar gelebet von zungmindarhaitn boda höarn mearar baz di ändarn di groazan problème boda hãm alle di lentar von pèrng.

Dena hattma ágeheft zo reda über in argomèto inngeschribet in tageordnung boda ágeat in dienst zo lazza seng di österraichegen kanél Orf 1 un Orf Sport in di lentar von zungmindarhaitn un in an tage in da gántz Provìntz, gianante zur inar pezzarung saiz azpe qualitét, saiz azpe innhalt, un ditza bart khemmen getánt in khurtza zait, rivante zo dekha o di sèlln plètz boda sin est soin gestánt auzgehakht azpe Lenzi in Bersental.

" 'Z iz an oportunitét vor da gántz provìntz, boda mage asó höarn un provàrn zo vorstiana a zung boda khint geredet da nãmp un darzuar vor di taütschan zungmindarhaitn an okasiong zo haba progrém in televisiong in di zung bosa se abestian: a bichtega initziatíf boda di Provìntz gloabet" hatta no köft darzuar dar Marchiori.

Di Sovilla o hatt khöft ke: "'Z iz a prodjèkt boda macht machan an bichtegen tritt vürsnen zo nempra di zungen, zo macha a bèlt boda khemmen geredet mearare zungen un aftz ditza di zungmindarhaitn vodar ünsarn Provìntz soin vorãnavür". Di Sovilla hatt gedenkht ke von sèll boda iz khent vorgelekk makma seng ke 'z izta gepezzart vil da tèknesche qualitét von progrém Orf. 'Z izta asó khent ágenump di naüing spetzifege tèknisch un dar naüige kontràtt un izta khent khöft ke ma halteta auzobetra in dienst in di djar boda khemmen.

An ent von arbatn izta khent khött dar tage vodar nèchste Konferéntz boda bart khemmen gemacht in månat von hoachnach 2025, in disa Konferéntz barta khemmen inngetoalt dar provintziàl Font vor di zungmindarhaitn un di politike zo schütza un vürzovüarase.

**Übarsetzt von Schaltarle vor di zung von Toalkamou vodar Zimbar Hoachebene**

(cdt)